



Christian J. Jenny (a san.), il president communal da San Murezzan, cun Urs Heller, il schef-redactor dal Gault Millau.

FOTOS G. N. STGIER



Piculezzas finas èn vegnidas servidas senza fin.



Gero Porstein (a san.), il schef da cuschina da l'hotel da luxus Waldhaus a Segl, cun il directur Claudio Dietrich.



Tratgas singularas ed en combinaziuns da na mintga di.



Da la partida al festival 2019 èn er cuschiniers da l'India.



Ils cuschiniers da renum internaziunal procuran per sairas culinaras da la classa superiura.

MAD

En il fratemp è il festival cult

San Murezzan: Festival per gourmets

DA GION NUTEGN STGIER / ANR

■ **Quest'emna segnan diesch cuschiniers internaziunals per glamur culinara a San Murezzan e conturn. Il Festival per gourmets è l'occurrenza nua che stailas e chapitschas èn da cuntin preschentadas.** Il Festival per gourmets n'è nagina concorrenza da cuschinar, ma bain in event cun la finamira da dar cuminaivel novs impuls al mund culinaric en l'Engiadin'Ota. Tantas stailas da «Michelin», puncts da Gault Millau, chapitschas e rosettas en in culp, quai datti be a San Murezzan tar il Gourmet Festival che tutga en tuts regards tar in dals singulars dal mund. En il fratemp ha il Festival per gourmets mundial caracter da cult ed è s'avanzà tar in grond inscunter da cuschiniers e cuschinieras da renum internaziunal e mangiabains da l'entir mund.

Fabrizio Zanetti è il nov schef dals events

La 26avla ediziun ha cumenzà cun «il Grand Opening» en l'hotel Kulm e va lura a fin sonda proxima cun la gronda saira da gala en l'hotel Suvretta. Da la partida èn diesch cuschiniers internaziunals da la classa superiura che chaschunan anc per dapli glamur culinara. Nov schef dals

events culinars è *Fabrizio Zanetti*, il schef da cuschina da l'hotel Suvretta. El ha ditg d'avair visità en ils decurs dal 2018 intgins cuschiniers che sajan da la partida quels dis al Festival per gourmets. El ha er menziunà ch'il festival a San Murezzan saja er sunter 26 onns in magnet per mintga cuschinier da renum. Adina puspè vulan ins copiar l'occurrenza per gourmets en l'Engiadin'Ota, dentant senza success. La regiun sezza saja gia in paradis per gourmets e cun vegnir vitiers anc ils cuschiniers internaziunals saja il Festival per gourmets en tuttas modas e manieras ina vaira cucagna. Zanetti ha ditg da na sa participar sez a festivals per gourmets, dentant sco giast-cuschinier en intgins hotels a l'exteriur saja el adina puspè. Stà saja el per exempel en in hotel en Malaysia ubain er en il Singapur.

Vins elegants

Tar in'occurrenza sco il Festival per gourmets vegn lura er bavi bier schampagn e cunzunt er vin. Sin il program stattan intginas degustaziuns da vin, tranter auter er cun la firma da vin Martel da Son Gagl. *Benjamin Wolf* da quel manaschi ha ditg ch'oz tshertgian ils consuments vins elegants e na pli da quels uschè grevs e fermes. Vins cun in'eleganza fina, vins plain color, cun in grond caracter e ra-

dunds sajan ozendi en il trend. Quai saja er ina raschun ch'els vins franzos sajan puspè en moda, ha menziunà Wolf. El ha er ditg che la gronda part dals vins grischuns tutgian er tar quels cun in'eleganza singulara e perquai sajan els er fitg dumandads.

Ils cuschiniers van al limit

Il «Grand Opening» en l'hotel da tshintg stailas Kulm a San Murezzan ha danovmain confermà ch'er ils cuschiniers da num e pum van propi al limit culinar. Tar l'occurrenza d'avertura dal festival han els fatg experiments e cumbinà spaisas che n'han insumma nagut da far ina cun l'autra. Particular è lura tuttina che mintga piculezza ha ses agen gust er en cumbinaziun cun in auter product. Da cuschinar pli fin è strusch pussaivel, è mintga singul plat stà ina vaira delicatessa. Tut en tut, en tuts regards in'aventura culinara tras il mund da la cuschina internaziunala e quai en in'atmosfera plain pompusadad. Cun envidar ils cuschiniers da tut las regiuns dal mund a San Murezzan vulan ils organisateurs e Zanetti, il president da las occurrenzas culinaras, er preschentar la gronda varietad da la cuschina internaziunala e quai quella da nivel fitg aut.



Dus dals novs stars da la cuschina en Svizra: Sven Wassmer e Fabrizio Zanetti (da san.).